

NAASULIARDARPI



NIVIAQ KORNELIUSSEN

Naasuliardarpi

OQALUTTUALIAQ

milik publishing ❄️

Miilla, qujanaq saninniikkavit.
Atuakkiaq Larsimut pigitippara.

Tulugaq sanningasulerujussuarmi iliveqarfiup isaariaaniittumi mitsimavoq. Inunnik erligisannik maani iliveqarfimmiittoqanngilaq. Aanaa maaniinngilaq. Misigisimavungali annaasaqarnikuullunga. Eqqaamasat ilunngunartut qaffakaapput. Upernalernerani unnuakkut maaniitillunga seqerngup tarrittarunnaarnissaanut annilaangasarsimanikka eqqaaqqippakka. Ukiup ataatsip matuma siornatigut aasarisseruttora unnuaq aappaluartoq eqqaavara. Taamani Sermitsiamut toqungasullu sanningasulippassuinut isikkivilerlunga qaqqajunnami issiiallunga inuuneq eqqarsaatigivara. Kisimiikkajuttarpunga, unnuarli taanna kiserliorpunga kissaatigigaluarlugulu uanga ilivermiissallunga. Aqquserngit ilivertut toqungatigipput, tulugarlu ungasinngisannut sanningasullit ilaannut mippoq. Meqqui qernerut qillerput, isai qernertut marserput, tarnera qernertoq kisimiilluni maaniippoq. Timmiaq qernertoq isigerujoorpara, seqerngullu minutsit 15-it matuma siornatigut tarrinnikup minutsit arlaqanngitsut qaangiuppata Sermitsiap tunuaniit nueqqinnissaa sivikitsumik puigoraluarlugu. Suut tamarmik aallaqqaataaniit aallarteqqinnissaat puigutallakkaluarpara. Tulukkap qaamarngup takkunnissaata tungaanut paarivaanga. Taava tingivoq toqungasullu akornannut qimallunga. Naluaami taarmut illersornanga qaamanermut illersortussaagaluarlunga.

TAAKKU

45. Arnaq. 38-nik ukiulik. Qimilluni.

Ujalleringaarama hvidviinnisukkamaluunniit tigunissaa annernarpoq. Tuniluuttorsuartut nukinnut siaruaannikuuvoq, kiatsima ataani tikinneqarsinnaanngitsuni alliartorlutillu annernarsiartorput. Ibumetinilluunniit tikissinnaanngilai. Anaanama isikkora erloqisoq ernumarpasilluni isigivaa. Minutsini qulini nipaqaanngivilluta akile-riilluta issiavugut.

„Tagiartulaarsinnaavakkit?“ aperivoq issiaviminiillu nikuilluni.

„Naamik, qujaannarpunga.“

Aggeriarluni assani nungullarnikutut ittut tuinnut tutsippai.

„Anaana, naaggaarpunga.“

Tuikka kissasserlugit aallartippoq. Saarngi gigtertut angillutillu manngerput. Soorlu inuttaa taamaattoq. Assakka seqqortippakka.

„Tassa, gigtileqinaatit.“

Facebooki marserujuulerpara. Arnap assinga taavalu emojiit uummataasat sequminnikorpasuit takullugit unippunga. Arnap sakiaani qorsummik neonimik qalipaatilimmik allassimavoq, „1981-2018, RIP.“

„Kinaana?“ anaana aperivoq. Siutikkut supisaqattaartuinnanngorlunga qanillivillunga aner-saartorpoq. Uffa aatsaat kissassiilluni aallartilluni anertikkalereerpoq. Takuniassammagu mobiliga qullaamivara.

„Ilisarinngilara,“ oqarpoq, „susoqarsimasoruna?“

„Ilimanaq imminorsimasoq.“

„Aar. Ajoqaaq,“ akivoq.

„Qujanaq,“ oqarpunga nikuillungalu.

„Aatsaat kissassilerpakkit,“ akivoq.

„Nalunngilat massageartinneq iluaagisariga.“

„Kia massageartinnissani iluarineq ajoramiuk? Piumanngitsutinuna,“ oqarpoq nujarmiunilu rødviinnisut qalipaatilik siilikimik sanaaq sakkortuumik peerlugu. Nujai tuinut nakkarpot.

„Qanoq piumananga?“ Hvidviinnimik najor-serujussuarpunga.

„Oqalukkusunngeriaravinuna piumanngitsuusaartutit!“ oqarpoq.

Naluippara qaqugukkut oqaluttassanerlunga qaqugukkullu nipangersimasassanerlunga. Soorlu uanga inuusaq batteriitortoq oqalutsikkusuleraanni naakkut toortagaq. Oqalukkaluartunga allatut oqartikkusullunga tooqattaarpaanga.

„Suna eqqartorusukkakku?“

„Nalunngilat!“ oqarpoq. Nutsani qilerniarlugit katersoqattaarpai, nujamininnguamik minitaqaraangami aatsaallu katersoqqittarlugit.

„Anaana, aalajangereerpunga. Allatut ajornaqaaq naammagiinnartariaqarpat.“

Eqikkusukkaluarlugu saperpara. Eqittannginga aratta eqqaamangilaraluunniit qanga kingullermik eqinnerluta.

„Aallarnissamut piareersimangilatit. Suna ajorami maani Ilisimatusarfimmi ilinnialeruit? Sooruna Danmarkimukartariaqarpit? Piareersimangilatit,“ oqarpoq.

„Sivisoorujussuarmik piareersimanikuuvunga.“

Viinnisugara aarloruteriarlugu ammukarpunga. Uffarfik imermik qalaangajattumik immerpara. Timimut qaqorsaata naqerujussuarlugu uffarfimmut kuigakku pullartaaqqat sumi tamaani teqqalalerput. Uffarfimmut ikigama timiga qasillerujussuarpoq. Minutsilli arlaqanngitsut qaangiummata malugisaaruppunga. Sequnngeriarlunga takorloorujuulerpara aasap naajartulernerani Italiami unnussiuarujoorlunga. Matukulli kasuttortoqarpoq. Anaana viinnimik nasarluni iserpoq viinnisorfillu nerriveeqqamut eqqanniittumut ilillugu.

„Ujallerininnut iluaqutaalaarpa?“ aperivoq. Isaruai aallerput.

Anngaavunga qallukkalu qummoorlugit. Uninngaannarluni arlaannik pisoqarnissaanik utaqqerujoorpoq. Iviangikka qapummik asserpakka. Aneqqumisaarneqarnini paasinngilaa.

„Kisimiilaarsinnaavunga?“

Anersaaruloriarluni anivoq. Tusaasinnaavara qaliani igaffimmi nipitoqisumik tuterluttartoq. Erruivik imaarpaa. Saviit, ajassaatit, alussaaitit puuguttallu eqqaannangajallugit iliorarpai, ataa-

tagalu oqalorussarpaluttoq tusaasinnaavara. Tupigeqaara maani najugaqarnissara sapersimanginnakku.

„Paasisinnaangilara sooq oqaloqatigiumannginneraanga!“ ataatanut oqarpallappoq, ataatalu paasisinnaanngisannik oqalorussarpaluppoq.

Tassa taamak pisarput, anaana unnerlorujoortoq, ataata eqqumiitsumik nipiliorluni akeqattaarujoor-toq anaana tusaaneqartutut misiginiassamat. Uffarfimmut morsullunga aqqaamavunga. Maani nipeqanngilaq. Minutsip affaa ingerlareersoq puakka tupamik minguttut anersaartorusutorujussuanngorput, minutsili ataaseq affarlu aqqaamaqqippunga. Sekundit kisippakka. Nipaassusermi minutsit marluk. Annannikunit arlalinnit tusarnikuaara ipingajalluni nuanneqisoq. Qalipaatinik ulikkaartoq. Eqqissisimanaqisorlu, ilami piffissap sivikitsup ingerlanerani ilisimajunnaariarlutik, nilloriarlutik 87 sekundit missaat ingerlareeraangata komalertaramik. Morsoqqippunga minutsillu pingasut aqqaamallunga. Qanoq aalisagaaraagaluaruma. Aalisagaaraq Italiami najugalik. Nipaassuseq naassaanngitsoq. Erniinnaq, eqqarsarpunga itisuumillu illumut anersaarlunga, erniinnaq manna qimassavara. Kisianni tassa Maliina aamma qimassavara.

Anaanap ataatap frikadellenut miseqqiaa kajortoq narrugigamiuk igaffimmi niaqulaajusattorsuartut pissuseqarluni nutaamik sanalluni aalaterivoq.

Ataatap nipaatumik akerliussutsimik takutitsil-
luni miseqqiani kinertorujussuaq ingasaallugu
kuivaa, puuguttani ulikkaangajavillugu. Sekundit
qulikkaapajaarlugit mobiiliga qiviaqattaarpara
frikadellellu oqummiuteriarlugit tamuarpiarna-
git iisaqattaarlugit. Naatsiat nungunngilaarikka
anaana naammassilluni ingikkiartorpoq.

„Ata nerivallaarnak, nalunngilat tarajortorpal-
laaraangavit qajuusartorpallaaraangavillu nillaa-
ginnaalertartutit,“ oqarpoq.

„Qaa, nerivugut!“

„Poortuivit?“ aperivoq frikadellellu miseqqia-
minut kinillugu.

Ileqimisaartorpunga.

„Sapaatip akunnerinnangorpoq! Errorsisus-
saavutit, immikkoortiterisussaavutit, torersaasus-
saavutit, kufferti naammannersoq takusussaavat
... eqqaamasassatit allattornikuuigit?“ aperivoq.

Miseqqiaa kajortoq frikadellemiit kuserpoq.
Soorlu timmik.

„Qaa, nerivugut!“ oqarpunga.

„Nerigaangatta oqaloqatigiittassaagut. Ulappu-
teqanngilagut,“ akivoq.

Miseraq kusertoq kamaasallunga tikkuartuler-
para. Frikadelle oqummiuppa. Tamuajunnaar-
sinnaangitsorsuartut tamuavoq, isumaqarpormi
sivisoorujussuarmik tamuaqqaarluni iisisaruni
nerrikinerussalluni. Miserarsuaq kajortoq sig-
guisa killingini nippussuuppoq. Illigisaarutivip-
punga Maliinalu allassimannersoq marserlugu.

„Angerlarsimavunga, piomaguit aggiinnassaa-
tit.“

Piomagama? Naatsiaq kingulleq erloqeqa-
lunga nakkartinniarsaripallappara.

„Qujanaq.“

„Aatsaat nerilluta aallartippugut!“ anaana
oqarpoq.

„Maliina aliasummat ornissagakku.“

„Qaquguuna taanna Maliina naapinniarip-
put?“ neriuteqarpassilluni aperivoq.

„Kammagiinnarpugut,“ akivunga.

44. Angut. 19-inik ukiulik. Aallaat atorlugu.

Pujorsuaq Akianut apuutereersimasoq naamasin-
naavara. Akunnerit arlaqanngitsut qaangiuppata
Nuummut apuutissaaq. Taava unnuaru seqinner-
navianngilaq. Maliinap inissiaanut ataatsimik
ineeralimmut iserpunga. Qarleeqqat timersuutit
naatsut atorlugit nalaasaarfimmi issiavoq.

„Una immikkoortoq naalaariarlugu,“ qungujul-
luni oqarpoq.

Nalaasaarfiup illuatungaanut ingeriarlunga
isai taartut isiginnaarujuulerpakka. Takusinnaa-
vara immikkoortoq atuagaa alianartuusoq. Atua-
gaq iligamiuk qinnguni eqippaa anersaarulul-
lunilu. Niaqquni sakissannut tutseriarlugu tigo-
rujussuarpaanga.